

The Electronic *Manipulus florum*
www.manipulusflorum.com

Incarnatio s
cum fonte primo

Verbi incarnatio hoc contulit facienda quod facta,
et sacramentum salutis humane in nulla unquam antiquitate cessauit.
Quod predicauerunt apostoli, hoc annunciauerunt prophete.
Nec sero est impletum, quod semper est creditum,

nec minus adepti sunt, qui in illud crediderunt promissum,
quam qui susceperunt donatum.

Leo papa ibidem (in sermone).

Verbi enim incarnatio hoc contulit facienda, quod facta,
et sacramentum salutis humanae in nulla unquam antiquitate cessauit.
Quod praedicauerunt apostoli, hoc adnuntiauerunt et prophetae,
nec sero est impletum, quod semper est creditum.

Sapientia uero et *benignitas Dei* hac salutiferi operis mora capaciores nos suae uocationis effecit,
ut quod multis signis, multis uocibus, multisque mysteriis per tot fuerat saecula nuntiatum,
in his diebus euangelii non esset ambiguum, et natiuitas Saluatoris,
quae omnia miracula omnemque humanae intellegentiae erat excessura mensuram,
tanto constantiorem in nobis gigneret fidem, quanto praedicatio eius et antiquior praecessisset et crebrior.
Non itaque nouo consilio Deus rebus humanis, nec sera miseratione consuluit,
sed a *constitutione mundi* unam eandemque omnibus *causam salutis* instituit.
Gratia enim Dei, qua semper est uniuersitas iustificata sanctorum, aucta est Christo nascente,
non coepta, et hoc *magnae pietatis sacramentum*, quo totus iam mundus impletus est,
tam potens etiam in suis significationibus fuit,
ut non minus adepti sint qui illud credidere promissum,
quam qui susceperere donatum.

Leo Magnus, *Tractatus septem et nonaginta*, 23.4 (CCSL 138, A. Chavasse ed., pp.106-7, ll.88-108).